

Urkundenbuch der Abtei Sanct Gallen (Ed. Wartmann) Nr. 740

† In nomine sanctae et individuae trinitatis Hludowicus divina favente clementia rex. Noverit omnium fidelium nostrorum, praesentium scilicet atque futurorum industria, qualiter nos cum venerabili viro Salomone episcopo et abbate monasterii sancti Galli quandam fecimus commutationem. Dedimus itaque eidem episcopo et abbati ex parte iuris nostri ad prefatum scilicet monasterium quicquid habuimus proprie ad nostram ditionem pertinens in pago Para in locis nuncupatis Vekkenhusa, Steiga et Tiunang, et quicquid ad ipsa loca sive in magnis, sive in parvis rebus iure ac legitime pertinere videtur, cum curtilibus, aedificiis, mancipiis omnibusque appenditiis supradictis locis rite coherentibus, et insuper prope lacum Potamicum in villa Thatalabahc dicta hobam unam, quam vir Wolfker dictus habitabat, et in orientali parte regiae curtis curtile unum ad hostium rivi Tiufenbah dicti duo iugera continens, cum via, exitu et aditu talique usu silvatico, ut qui illic sedent, sterilia et iacentia ligna licenter colligant cum mancipiis, aedificiis et omnibus appendiciis ad predictam hobam pertinentibus; hoc quoque ad augmentum huius donationis addidimus, ut omni anno potestatem habeant decem molares lapides ibidem incidere. Econtra ipse episcopus et abbas ex parte monasterii dedit nobis in Svalavelden curtem unum Pappenheim nominatum, similiter cum omnibus iuste ac legitime ad ipsum pertinentibus; ob hoc videlicet, ut eundem curtem cuidam fideli nostro nomine Meginwart in proprium traderemus. Quapropter volumus et iubemus, ut quicquid ex parte nostra parti monasterii vel ex illa nobis collatum est et traditum, a die presenti omni deinceps tempore iure firmissimo teneatur et absque ulla mutabilitate perenniter possideatur. Et ut hoc nostrae auctoritatis preceptum firmum stabileque consistat, manu nostra illud firmavimus et sigillo nostro consignari iussimus. Signum domni Hludowici M serenissimi regis. Ernustus cancellarius ad vicem Theotmari archicappellani recognovit et subscripsit Data XII kal. febr., anno incarnationis Domini DCCCCV, indictione VIII, anno autem regni domni Hludowici VI. Actum Potamico palacio in Dei nomine. Amen.